

永豐縣新志

第三冊

卷七

人物

卷八

藝文



永壽縣新志卷七目

人物

名臣

循吏

儒林

文苑

忠節

孝義

獨行

寓賢

方技

仙釋

列女

永壽縣新志卷七目



084677



永壽縣新志卷七

知縣蔣基重修

人物類

名臣 獨行

循吏 寓賢

儒林 方技

文苑 仙釋

忠節 列女

孝義

名臣

隋

隋書杜彥傳彥雲中人徙家於南幽性勇果善技射仕周爲左侍上士擊破陳將吳明徹又擊叛蠻進平郢州賊帥樊志以功拜大都督賜爵永安縣伯從韋孝寬擊尉遲迴於相州每戰有功封襄城縣侯開皇初進爵爲公平陳之役以行軍總管渡江擊南陵城拔之擒其守將許翼進位柱國復從楊素討破江南羣盜拜洪州總管甚有治名歲餘徵拜雲州總管突厥來寇彥輒禽斬之北夷畏憚不敢至塞未幾以疾徵還卒

永壽縣新志卷七

唐

唐書來瑱傳瑱邠州永壽人父暉奮行間開元末持節磧西副大使四鎮節度使著名西邊終右領軍瑱略知書尚名節崖然大有志天寶初從四鎮任劇職累遷殿中侍御史伊西北庭行軍司馬詔舉智謀果決才堪統衆者拾遺張鎬薦瑱能斷大事有禁侮才擢潁川太守充招討使會母喪免以孝聞安祿山反張瑊薦之守潁川賊來攻瑱前後俘殺甚衆賊懼目爲來嚼鐵以功就加防禦使河內淮南游奕逐要招討使徙山南東道節

度使代魯炁會嗣號王巨表炁方固守乃還瑱故官職  
圍南陽急人情恟懼瑱能撫訓士卒舉動安重賊不得  
侵改淮南西道節度使兩京平封穎國公食二百戶乾  
元二年徙河南未行王師敗於相州詔拜陝虢節度兼  
潼關防禦團練鎮守使明年徙山南東道襄鄧均房金  
商隨鄂復十州節度使上元二年春破史思明餘黨於  
魯山俘賊渠又戰汝州獲馬牛橐駝凡兩戰斬首萬級  
改山南東道襄鄧唐復隨郢六州節度代宗立復使鎮  
襄州入朝拜兵部尚書同平章事充山陵使是時程元  
振居中用事瑱乃告與巫祝言不順帝怒遂下詔削  
其官貶播州卒後帝徐悟元振誣以他罪流漆州廣德  
元年追復瑱官爵

新書卷七  
學冊入  
鄉賢祠

按葉少蘊避暑錄語唐書來瑱傳云始用張鎬薦爲  
穎川大守以母憂去祿山反再用張垧薦奪喪復爲  
穎川今考杜周人物志至德初詔朝臣舉所知蕭昕  
爲起居舍人薦張鎬以褐衣名見拜左拾遺而來瑱  
爲穎川太守在天寶十四載卽至德元年祿山反後  
是時鎬方起家何能及瑱而張垧兄弟自京師陷卽  
叛從祿山未嘗見明皇亦何由復薦瑱史於瑱事不  
無謬誤也

明

陝西通志楊儀字鴻羽乾州永壽人宏治中登進士第



慕宋王沂公之爲人立志不在溫飽一時成以公曠期  
之歷官山東參政揚清激濁所至赫赫有聲

循吏

明

舊志劉聚成化辛丑進士知永寧縣值歲荒聚廉能有

善政饑而不害 騫璿由舉人仕至同知歷二十載吏

畏民懷謝政里居人服其敬信 劉宣以鴻臚鳴贊擢

彭水令清介不渝 王相由貢生任通判老成忠實不

事浮華 趙鑾由貢生任縣丞廉介有芳聞 張其蘊

親喪廬墓三載後以延安司訓署邠州事多惠政抵里

囊橐蕭然

學冊劉聚璿  
二人入鄉賢祠

稱 張志楊威例貢生以營繕才判亳州江津兩地卓有聲

儒林

漢

後漢書李育傳育右扶風漆人少習公羊春秋沈思專

精博覽書傳知名太學深爲同郡班固所重薦育於東

平王蒼由是京師貴戚爭往交之州郡請召育到輒辭

病去避地教授門徒數百涉獵古學嘗讀左氏傳謂不

得聖人深意作難左氏義四十一事建初元年衛尉馬

廖舉育方正爲議郎後拜博士四年詔與諸儒論五經

於白虎觀育以公羊義最精育達往返皆有理證最爲通

儒再遷尙書令及馬氏廢育坐爲所舉免歸歲餘復徵再遷侍中卒於官

宋

鄧縣志永壽人焦寅湛深經術張橫渠師之

明

舊志狙簠由貢生官教諭恭儉有學術不愧師儒風範

王宏謨由歲貢官信陽州訓導操守清介貫穿經傳

本朝

縣册張星聯在永里人爲諸生耻俗學志古儒者恂恂

蘊藉負狷性居家門無雜賓所著詩文盈篋焚棄無復

存者當事重其爲人往往求一識面而不可得時謂段

干泄柳復見於今晚歲以明經舉鄉飲賓未赴而卒

文苑

宋

隆平集史天常邠州永壽人熙寧中仕至朝散大夫爲

人端厚沈敏強學多識文詞溫潤詩亦閑遠雅懷溪山

趣適號漆上先生有漆泉集十卷行於世

漆泉在縣東北

忠節

明

張志任棟由貢生授萊州府通判歷陞海防道協勦闖

賊會滌兩兵潰遂陷重圍大呼曰我監軍也恨不斬賊

萬段遇害於朱仙鎮



表忠錄保定監軍道任棟力解汴圍因左兵潰陣而死  
棟永壽人貢生

按二說稍異存其人不必覈其事傳疑正以表忠也  
張志趙士達由歲貢任莊浪教授素性剛直有長者風  
賊破城被執罵賊而死 張應泰貢生賊破堡手刃數  
賊賊怒割其脣 張惟一貢生應泰姪罵賊奮不欲生  
賊義而釋之 王良化拔貢生賊僭稱帝號強授以官  
抗節不仕

按以上所謂賊皆指李自成也明末闖寇流毒蹂躪  
關中蔓延及下邑而永以叢爾山陬不少效忠秉節  
孝義之士彼有人焉爲詠疾風勁草句矣

永壽縣志卷七

五

### 孝義

元

陝西資政錄百用字器之居縣之北市引泉入城內民  
利賴之素有出塵之想結廬泉上犢鼻逍遙每見渠水  
洩卽爲補葺入鄉賢祠

明

舊志樊志賢留村里人五世同居 陳粟永康里人割  
股療母病鄉人稱孝子 宋寧彭村里人隆慶二年饑  
同弟宁各輸粟百石民藉以存活者甚衆 楊守奇強  
化里人傭工葬父拾得涇陽客遺金二十俟其至付之  
令給扁以表其門 樊整留村里人兄遺男周歲撫育

成立析已產給之年百有五鄉人稱爲百歲公咸慕其  
德福兼備

陝西資政錄楊邦梁乾州永壽人通判威之子由貢生  
授檢校官內行純備見義敢爲嘗讀宋史劉几傳謂邠  
地鹵民病遠汲几浚渠引水水果至鑿五池於通遠民  
大便利慨然奮曰淪水利人古賢且有創爲之者况吾  
邑有呂公白氏舊渠可因其利以利之乎於是鳩工疏  
鑿凡餼糧器用諸費咸自辦之竟復舊貫入鄉賢祠

張志劉永芳生員親喪廬墓而居撫成親姪出粟救荒  
本朝

縣冊張琬上彭里貢生鄉飲太賔幼聘廩生梁紹模女

永壽縣新志卷之七

六

爲室未婚而女得疾一目盲家人慮其不任婦職勸琬  
辭婚琬慨然曰聘在前盲在後命也我弗娶將誰歸卒  
娶之後舉四子元佐元愷元傑元仕皆有聲鬻序中孫  
中慮亦能嗣其業曾孫玉梁已酉拔貢時咸謂不棄盲  
女之一念有以肇之 元愷琬次子太學生慷慨好施  
乾隆十七二十六並三十六年年不順成元愷散貨借  
粟村中五六十家胥賴以存濟又善解紛息訟里人俱  
以長厚推之 元傑琬第三子武生事繼母以孝聞時  
募修 文廟垂成物力頓絀元傑乃鬻產得數百金悉  
捐以充用由是克潰於成人服其義

獨行



明  
嘗志魯邦輔車村里人直醇慷慨令署爲亭長萬歷丙戌丁亥大旱貧不能舉火有饋食者卻不受闔家餓而死

寓賢

漢

史記婁敬傳敬齊人漢五年戍隴西過洛陽高帝在焉敬脫輓輅衣其羊裘因齊人虞將軍見上說上都秦高帝問羣臣羣臣皆山東人爭言周王數百年秦二世卽亡不如都周上疑未能決及留侯言之上卽日車駕西都關中賜敬姓劉氏拜郎中號奉春君後封建信侯

永壽縣新志卷七

七

舊志敬晚年投閒好時有異術種金利人今明月山有種金坪將卒召里人囑曰爲廟祀我我有以福汝矣頃之雲霞飛集而逝

漢書陸賈傳賈楚人以客從高祖定天下使南越令趙

佗稱臣奉漢約歸報高齋大悅拜賈爲太中大夫孝惠時呂太后用事欲王諸呂畏大臣及有口者賈自度不能爭迺病免以好時相地善祚家焉有五男迺出所使越橐中裝賣千金分其子子二百金令爲生產賈常乘安車駟馬從歌鼓瑟侍者廿八詔其子曰與汝約過汝汝給人馬酒食極飲十日而更

唐

全唐詩長孫無忌字機輔河南洛陽人文德皇后之兄  
好學有籌略佐太宗定天下以功第一封齊國公歷尙  
書僕射司空戒懼盈滿固辭不許復拜司徒貞觀十七  
年圖功臣二十四人於凌煙閣無忌爲之冠高宗卽位  
進册太尉知門下省後爲許敬宗誣構貶死黔州

新舊唐書

俱有傳文  
繁不具錄

舊志長孫無忌河南人太宗面定勲臣圖凌煙閣皆第  
一爲吏部尚書議定建令寬絞刑五十條貞觀七年以  
開府儀同三司爲司空固辭曰臣忝預外戚恐天下謂  
陛下私不許十七年進太子太師帝疾篤謂太子曰無  
忌盡忠於我我有天下多其力也勿令讒人間之與褚  
遂良同受顧命高宗初諫立武昭儀貶黔州投繯卒

永寧縣新志卷七

八

按趙公之寓居永壽史傳皆無明文然長孫氏聚族  
居縣東之永壽坊已歷數十世比有武生長孫步雲  
自稱紹先二十四代孫曾修祖墓之在堡城北缺上  
者及詢其世譜則云自紹先以後俱失之今考唐書  
宰相世系表長孫氏出自拓拔鬱律鬱律生二子長  
曰沙漠雄次卽道武帝沙漠雄生嵩道武帝以嵩宗  
室之長改爲長孫氏此長孫得姓之始也孝文帝太  
和中詔自代北而徙者皆爲河南洛陽人自嵩至無

忌蓋第十三世矣無忌生冲冲生延延生元翼元翼  
生訓訓生釗釗生守貞守貞生全緒全緒生燧燧生



四子紹先恭先孝先稚先意者長孫氏始遷永壽之  
祖其卽紹先兄弟歟夫趙公於太宗爲元勳於高宗  
爲元舅位尊任重何嘗一日離廟堂泊乎遭讒遠貶  
其親以上遷謫靡遺又無由得至永壽內地也審矣  
舊志但因長孫氏裔孫家此遂指趙公爲是邦之寓  
賢所謂附會之辭初非實錄識者詳之

唐書安金藏傳金藏京兆長安人在太常工籍睿宗爲  
皇嗣少府監裴匪躬中官范雲仙坐私謁皇嗣皆誅死  
自是公卿不復見惟工優給使得進俄有誣皇嗣異謀  
者武后詔來俊臣問衆左右畏慘楚欲引服金藏大呼  
曰公不信我言請剖心以明皇嗣不反也引佩刀自剖

永壽縣新志卷七

九

腹中腸出被地眩而仆武后聞大驚輿致禁中命高醫  
內賜襪桑土紕之閱夕而蘇后臨視嘆曰吾有子不能  
自明不如爾之忠也卽詔停獄睿宗乃安景龍時擢右  
驍衛將軍爵代國公卒配饗睿宗廟廷大歷中贈兵部  
尚書諡曰忠

學冊入  
鄉賢祠

舊志今縣南有安金藏墓并安家空鋪

按舊志謂縣境有安家墳壙遂以金藏爲永壽人推  
爲人物之首張志雖知爲長安人然僅據陝西通志  
不知有新舊唐書可證也今日爲寓賢庶不沒其實

耳

方技

晉書苻堅載記新平人王彤陳說圖讖嘗言於堅曰謹案讖云古月之末亂中州洪水大起健西流惟有雄子定八州此卽三祖陛下之聖諦也又云當有草付臣又土滅東燕破白虜氏在中華在表案圖讖之文陛下當滅燕平六州願徙汧隴諸氏於京師三秦大戶置之於邊地以應圖讖之言堅訪之王猛猛以彤爲左道惑衆勸堅誅之後堅以其言有驗追贈彤官

宋

圖畫見聞志侯封邠州永壽人工畫山水寒林始學許道寧不能踐其老格然而筆墨調潤自成一體亦郭熙之亞

永壽縣志卷七

十一

明

輶軒瑣記隆慶初永壽縣淡村有術者云近世乃下元甲子用事正直天市垣所以人多好市井牟利之事按乾志云州人不嫻技術而醫學尤疎蓋合屬邑言之自昔然矣

本朝乾隆初有岐山人趙奇精女科挾術來遊其子必伸善治傷寒活人甚衆遂家於縣南之監軍鎮必伸之子魏能讀祖父書於思邈千金方尤得要旨遠近知名五十二年冬十一月有司獎異之爲顏其堂額曰



金筍瑣探道家謂蟾蜍萬歲背生芝草食之換骨上昇  
至正中乾州永壽縣南清宜觀有住持殷純者晨起汲  
水得諸智井旁初不知何物也煮而食之偃卧寂然者  
旬日儕輩謂其已死棺殮瘞山下月餘忽走入觀問訊  
如平時頃之失所在衆皆駭惑發棺視之惟衣履存焉

明

舊志石寶金號碧峰禪師有異行嘗趺坐大樹下溪水  
橫溢人意禪師已死七日水退視之燕坐如常後遊五

臺山元順帝召至燕都慰勞甚至洪武初奉詔至南京

永壽縣新志卷七

七

住天界寺時名問佛法及鬼神情狀奏對稱旨御製詩

以賜之及卒翰林學士宋濂為按舍利塔銘

銘載茲文類

歸田集跋碧峰禪師塔銘金陵梵刹志載碧峰寺記稱

師棄髮存鬚出使西洋諸國投爵固辭按俗所傳西洋

記稱碧峰同三寶太監下西洋事蓋委巷小人之語寺

記殆承此訛也鄭和等使西洋自永樂七年師示寂久

矣記又稱師祈雨靈異為真人所憎投之水火無損後

辭歸西域已時陞辭期午時出潼關是日以上賜袈裟

遣守關吏奏上按師生於乾州永壽縣而曰西域胡僧

示寂金陵茶毗聚寶山而曰辭上西歸世壽六十有五

而曰年逾七十益又謬矣明初大浮屠惟碧峰最著流

傳神異未易更僕寺記所載皆非實錄他可知已

本朝

張志已亥六月有道士過永旅食塗中憩於城隍廟三

日取筆留題不書姓名閤人得遺詩以報閱其詩卓有

才思令人蹤跡渺不知其所之

詩載藝文類

列女

唐

舊志竇氏二女強化里江竇村人幼有志操永泰中羣

盜剽掠二女匿岩穴中盜跡而得之將逼以私行臨深

谷姊曰吾寧死不受辱即投唾死妹繼之亦折足破面

盜義之而去京兆第五琦奏其行烈詔旌異之伊村有

永壽縣志卷七

七

廟通志曰奉天人蓋永壽乾之隸也今竇氏族甚著

按唐永泰中永壽縣屬邠州非乾隸也舊志失考

元

舊志田氏三婦上宜里人長適郝年二十一仲適周年

十八季適胥年十七夫俱亡守節無玷有司以聞詔旌

表其門

明

舊志胡氏生員李棟妻年二十五 李氏縣民趙學妻

年二十六夫亡無子俱以節烈終 楊氏生員任廷舉

妻年十九 郝氏生員宋宇妻年二十一 劉氏生員

楊順妻年二十五 傅氏生員王在程妻年二十六夫



卒撫幼子成立俱以守節終 王氏縣民劉宗樂妻年

十九夫亡撫遺腹子成立萬歷二十年終壽七十 許

氏生員樊希思妻年二十五善事翁姑妯娌無間言夫

亡矢同穴嘔血以死 王氏徂登妻年二十五夫卒遺

三歲孤叔翁強氏他適則溺其孤幸有援者得不死孤

長成弗祿乃撫育諸孫備嘗艱苦以壽終 魯氏縣民

李油然而妻年二十五夫卒富室遺幼填門叔伯欲奪其

節氏截髮示志以織紵餬口守節三十一年壽五十六

騫氏生員張簡妻年二十八剛介有丈夫風夫卒妾

趙氏生一子方周歲氏撫育勤劬不啻已出事孀姑以

孝聞後族有謀傾貌若孤者氏百計保護得成立壽七

十五令表其慈節 師氏縣民王養中妻年二十二夫

亡撫一歲孤成立翁姑不祿喪葬如儀而又調其猶子

之貧乏者壽六十 騫氏騫九思女幼字趙本初趙故

富而騫家漸蕭索趙遺書罷婚九思領之女曰不死奈

辱先人何乃澡身整服半臂禪襦以至副膝腳帶一切

密紵之強婢導至趙所呼寃自刎死之日尸不殞目不

瞑溽暑色澤如生異香馥郁遐邇觀者無不隕涕邑令

杜庀木以殮方天開口霽俄而迅雷驟雨一邑震驚杜

撰哀詞奠之則開霽如初得襄事邑諸生具呈擬達之

當道而趙氏懼獲旌賡緣格之直指使王觀風下邑偶

於邑乘內獲其呈葢令下之吏所嚮署誌中未及檢取

而遽以投院者也儼若有鬼神使之矣直指使愕然於時移檄旌異曰真烈女諸扁題甚偉不具錄有爲之傳者曰幽風未泯正氣鍾毓以繼二寶之烈良無愧歎

師氏小字嬌姐師第女第與族人師訊構訟訊病死其母誣以毆訟之令第逃匿捕者請其家偶牽女衣女不勝憤沮自縊而死事在萬歷三十四年里人匿不發逾十載始聞之縣學諸生云 巨氏縣民師誥妻割臂啖夫嚼指矢志 白氏縣民李行保妻與嫂同嫠獨凜栢舟之節撫姪如子竟延李氏之宗 楊氏生員史書妻年二十四夫亡甘守清貧育子鉅典成立得叨青衿以壽終焉 員氏縣民趙應聘妻年二十三無子止一女

全善縣新志卷七

七

本朝  
勵志撫養出閨年七十遇奇荒塞戶絕隣不食而死  
陳氏貢生粗衍漆妻氏抱幼女與姑被賊同擄賊欲刃姑挾氏行氏奪賊刀殺女自刎賊驚異之姑乃得釋

張志近聞之里民有師氏者生員羅珍妻盡孝奉其姑勵節成其子有劉氏者廩生談吐瑋妻孝事孀姑育成孤子有劉氏者邑民張尙餘妻謹事翁姑生養死葬教訓孤子入庠不幸早亡乃撫二孫成立壽已八十此皆以青年矢志相舟但事定蓋棺姑錄之以備采風者

縣册盧氏甘肅環縣民趙會妻寄籍縣南之樊家坪氏

因李六強姦不從被害捐軀明志節烈堪風乾隆十一



年奉

旨旌表 師氏邑人夏泉妻翁姑早逝夫亡忍死撫育繼子以綿嗣續子甫娶而天家計蕭索與孀媳張氏相依守節復繼族孫承祀日夜操作撫養成人宗緒賴以弗墜守節三十八年乾隆十二年奉

旨旌表 都氏邑人李翔鳳妻夫亡孀姑在堂矢志苦守親隣閔其年少微勸改絃卽哭誓幾絕以夫兄次子協焯繼嗣教育辛勤撫如已出事姑晨昏不懈績紡以供饗飧姑歿之後喪葬盡禮鄉黨稱焉焯年弱冠卽遊庠序守節三十三年乾隆十二年奉

旨旌表 任氏邑人夏芳妻夫死遺孤僅周歲忍死撫育永壽縣新志卷七姑已先逝翁因哭子喪明病卧床褥氏賣髮延醫服藥無效翁又不祿氏茹苦自甘織紵餬口守節三十八年乾隆十二年奉

旨旌表 董氏邑人周鏡妻夫亡姑老遺雛甫二歲氏矢志栢舟茹荼自勵事姑盡孝訓子有方姑歿喪葬如禮長子師孔遊庠間里稱爲慈孝守節五十五年乾隆十二年奉

旨旌表 夏氏邑人王立妻夫亡翁姑在堂家貧如洗每日磨賣豆腐供食生事死葬盡禮盡哀氏夫胞弟王瑀胞姪王道洽幼弱無依撫訓成立入武庠領鄉薦守節

五十四年乾隆五十二年奉

旌表

劉氏車平里人嘗永倉妻年十五歸嘗三載夫

亡亡後七日方得一男名福彰卽生員嘗守信之父也

又二年翁亦病故惟姑劉氏在堂家徒四壁親族多勸

氏改適氏蓬首垢面誓養老姑晝耕夜織撫育稚子娶

婦成家有孫入泮享年七十而終乾隆三十七年孫大

令陳廣文俱給扁旌之曰松筠勁節節孝雙全 蒙氏

寧化里人陳所倉妻年十五歸陳夫亡姑老二子俱幼

氏矢死靡他茹荼操作養姑盡孝育子有成享年七十

有一王大令祁廣文俱給扁云栢舟自誓貞烈可風

學冊成氏車平里人李振義妻年十六歸李生三子自

新自植自綦夫死家貧氏茹苦自甘育諸子成立自植

遊庠自新自綦俱食餼守節五十餘年享壽八十 傅

氏車平里人李自選妻年十五而嫁嫁四年而夫亡遺

孤李琴尙在襁褓氏勵志冰霜養孤成立鄉里稱焉

張氏上彭里廩生來宜妻夫亡子秩幼穉伶仃氏矢志

食貧撫孤成立守節三十餘年 尙氏寧化里民張宏

昌妻嫁八年而夫歿遺孤名可造僅二歲孀姑年七十

餘氏養姑育子艱苦備嘗後可造成立遊庠孫張儒學

武相繼入類氏守節六十年壽八十有四卒 王氏上

彭里廩生張元仕妻年二十七而寡矢志靡他嗣夫兄

之子爲子教育成名守節數十年卒 齊氏邑民任作

勤妻年十九夫亡嗣一子名百祥撫養成立授室未久



百祥又歿妻魏氏年二十四遺孤名鴻儒甫一歲是時齊氏漸老魏氏養孤抱子備歷艱辛卒成雙節云 李氏廩生傅連登妻年十九而寡遺孤永春最幼家四壁氏朝春夜績備茹百苦娶媳張氏生孫俊義教養成立補縣學生員氏守節五十餘年卒

按前廣文張君培言邑民王自適妻任氏年二十四夫亡遺一子一女家極貧而誓無他心後子女相繼死節操益堅顧氏猶生存張志有事定蓋棺之論附書簡末永式彤徽庶鄉閭巾幗追芳躅而勵貞風者不復以格於成例爲憾云

永壽縣新志卷八目

藝文

碑

記

考

辨

詩

永壽縣新志卷八目



表

徵

書

目

藝文



永壽縣新志卷八

知縣蔣基重修

藝文類碑記考辨詩

碑元

無名氏漢建信侯廟碑漢建信侯齊人也姓婁諱敬漢高皇帝五年以布衣見上議都關中即日車駕入關賜姓劉封奉春君七年使匈奴知不可擊帝輒往侯不可上怒囚之平城圍解特原其罪封建信侯乾州好畤縣明月山有廟今廢屬永壽縣銘云侯乃隱居此山而得道者也能種黃金有種金坪將幸召邑人囑曰爲廟祀我吾有以福汝矣言訖雲霞飛集而去熙寧二年碑知鳳翔府郵威撰文好畤令雷壽松爲民禱雨應又曰唐刻寶歷三年令韓德禱雨應先後雲其事甚異其碑今亡矣侯功成名遂慨然致仕歸老知足不辱已獲輕舉且侯用片言取信萬乘之主當時何良平勃弗能措其辭拜君封侯績標青史名揚後代不賢者能乎用之則行舍之則藏惟懷道者能之云云至大戊申始洗月朏日天和

明

宋濂雲寂寺汝照禪師舍利塔碑禪師諱寶金族姓石氏其號爲碧峰生於乾州永壽縣父名通甫宅心從厚

人號爲長者母張氏亦好善不倦有桑門持鉢乞食以觀音像授張且囑曰汝謹事之當生智慧之男未幾果生禪師白光煌煌煜然照室幼恒多疾纏綿衾枕間父母疑之曰此兒感祥徵而生其宜歸之釋氏乎年六歲依雲寂倡法師爲弟子旣薤落受具戒徧詣講肆窮性相之學對衆演說纍纍如貫珠聞者鮮願已而拊髀嘆曰三藏之文皆標月之指爾昔者祖師說法天華續紛金蓮湧現尙未能出離生死况區區者耶卽更衣入禪林時如海眞公樹正法幢於西蜀晉雲山中亟徃見之公示以道要禪師大起疑情三二年間寢食爲廢偶攜僮隨公擷蔬於園忽凝坐不動歷三時方寤公曰爾入定耶禪師曰然曰汝何所見曰有所悟爾曰汝第言之禪師舉篋示之公非之禪師寘篋於地拱手而立公又非之禪師厲聲一喝公奮前搥其背使速言禪師築公顛仆之公又未之許笑曰塵勞暫息定力未能深到必使心路絕祖闕透然後大法可明耳禪師聞言愈精進不懈遂出參諸方憇峨眉山勢不復粒食日採松栢啖之脅不霑席者三年一念不生前後際斷照體獨立物我皆如自是入定或累日不起常趺坐大樹下溪水橫逆人意禪師已休死越七日水退競往視之禪師燕坐如平時惟衣濕耳一日聽伐木通身汗出如雨嘆曰妙喜大悟十日入小悟無算豈欺我哉未生前之事吾今



日方知其真爾急往求證於公戶復相辯詰甚力至於  
自悟禪榻而出公曰是則是矣翌日重勘之至期公於  
地上畫一圓相禪師以袖拂去之公復畫圓相禪師於  
中增一畫又拂去之公再畫如前禪師又增一畫成十  
字又拂去之公視之不語復畫如前禪師於十字加四  
偶成萬文又拂去之公乃總畫三十圓相禪師一一具  
答公曰汝今方知佛法宏勝如此也百餘年參學有悟  
者世豈無之能明大機用者寧復幾人無用和尙有云  
坐下當出三虎一彪一彪者豈非爾耶爾宜往朔方其  
道當大行也無用蓋公之師云先是禪師在定中見一  
山甚秀拔臺閣崢嶸金碧絢爛諸佛示化二菩薩行道  
其中者指禪師謂曰此五臺山秘魔巖也爾前身行道  
其中靈骨猶在何乃忘之既寤遂遊五臺山道逢蓬首  
女子身披五彩帔衣赤足徐行一黑獒隨其後禪師問  
曰子何之曰入山中耳曰將何爲曰一切不爲良久乃  
復扣之同行者皆弗之見或謂文殊化身云禪師就山  
建靈鷲菴四方聞之不遠千里負餼糧來獻者日續紛  
也禪師悉儲之以食遊學之僧多至千餘人雖丁歲大  
儉亦不拒也至正戊子冬順帝遣使者召至燕都慰勞  
甚至天竺僧指空久留燕相傳能前知號爲三百歲人  
敬之如神禪師往與叩擊空瞪視不答及出空嘆曰此  
真有道者也冬月大雪有紅光自禪師室中起上接霄

漢帝驚嘆賜以錦紵伽黎衣遣歸明年己丑復召見於  
延春閣命建壇禱雨輒應賜以金縉若干禪師受之卽  
以賑饑乏民又明年庚寅特賜寂照圓明大禪師之號  
詔主海印禪寺禪師力辭名香法衣之賜殆無虛日自  
丞相而下以至武弁悍將無不以爲依歸已而懇求還  
山洪武戊申大明皇帝卽位於建業明年己酉燕都平  
又明年庚戌召禪師至南京夏五月見上奉天殿且曰  
久聞師名以中州苦寒特延師居南方耳遂留於三天  
界寺時召入問佛法及鬼神情狀奏對稱旨又一年辛  
亥冬十月初上將設普濟佛會於鍾山高行僧十人蒞  
其事而禪師與焉賜以蒲僕於崇禧寺大駕幸臨移時  
方還明年壬子春正月旣望詣沙門方畢集土服皮弁  
服親行獻佛之禮夜將半勅禪師於圓悟閣施摩伽陀  
斛法食竣事寵賚優渥卽玉環錦袈裟之類夏五月悉  
鬻衣孟之資作佛事七日乃示微疾上知之親御翰墨  
賜詩十二韻有元關盡悟已成正覺之言天光昭回人  
皆以爲榮時疾已革不能詣闕謝至十月四日沐浴更  
衣與四衆言別正襟危坐目將與弟子祖全智信請曰  
和尚逝則逝矣不留一言何以暴白於後世耶禪師曰  
三藏法寶尙爲故紙留言欲何爲夷然而逝壽六十五  
僧臘五十有九候三日奉龕茶毗於聚寶山傾城出送  
香幣積如邱陵或恐不得與縹緲之列露宿以候之及



至火滅獲五色舍利齒舌數珠皆不壞紛然爭取灰土  
爲盡禪師體貌豐偉端重寡言笑福惠雙足所至化之  
故其在山也捧足頂禮者項背相望其應供而出也持  
香花擊梵樂迎者在在而有不啻生佛出現其行事可  
悉書弟子散之四方無以會其同某等將以某年某月  
建塔於某山乃掇其大略請安次王普爲狀一通徵濂  
爲之銘上祀方丘宿於齋宮濂與禮部尙書陶凱實侍  
左右上出賜禪師詩令觀之其稱禪師之德爲甚備夫  
聖人之言天也因知禪師之道上與天通下從人望雖  
不獲任名山大利要可以無憾然而月林觀公遠承臨  
濟正宗其第五傳曰無用寬公竺源盛公竺源之道行

於南無用之道著於北禪師蓋無用諸孫也濂近銘竺  
源之墓令又述禪師之行而文諸碑嗚呼哲人云亡奈  
何不興大法衰微之嘆乎銘曰臨濟崇崇西來正宗益  
衍以鴻三虎怒投中有一彪氣可吞牛性相紛拏瓜蔓  
交加入海算沙乃易禪衣乃抵勝師乃治其疵棲身孱  
顏絕去八還入第一關河水浸淫跌坐樹陰爰濕我襟  
我松我糗我泉我漿渴饑兩忘實相圓通無物不容悟  
其本空元微肇胎陟彼五臺樓閣門開南粵北胡方衣  
圓顱水赴雲趨無間儉豐香積之充且妥其躬其名上  
聞便蕃宸恩來自帝闕於赫皇明遣使奉迎館於神京

龍文成章日晶月光鬻其寵榮國衆所依胡不寶茲而

亟其歸泰山崔崔一旦其頽靡人不哀有宥者岡白虹吐芒舍利之藏

薛瑄至聖文宣王廟碑邠州之永壽實古豳國之地縣學有大成至聖文宣王殿創自前代我皇明統一寰區首崇儒教大詔天下建學立先師廟有司以時致祭毋俾廢怠於時宣聖殿以及兩廡固嘗新理之然歷年既久漸迄敝漏及創始之際又卑陋不足以展禮事神今縣令山西高平郭質以鄉舉發身來知是縣始至進謁聖廟瞻仰周顧大懼無以仰副國家崇明祀育賢才之意退而卽欲興修然以邑民僅千室力單財寡所需之物無自由遂行視縣城內外遠近官宇隙塹園地得數百畝督令有役於官者假借耕具給與種子俾以時種穫其間積凡三歲得穀麥若干斛復借民車輪至咸陽渭水之次易木以歸且先於農隙時以餘穀僦工埏燒瓦甃覆蓋墁飾諸物百用既具乃於天順元年七月洎其縣丞新城馬騏典史饒陽宋準協心鳩工興作擴舊時大成殿三間爲五兩廡舊各五間今俱增四爲九以至戟門櫺星門神厨神庫次第改作基宇高廣壯固有加於前始事於是月十九日竣事於次年七月明倫堂兩齋及生徒退習之室用工小而先已新葺獨殿廡神宇畀新之功爲大於時教諭壽州薛澄訓導臨汾安廣進諸生而商之曰惟是廟學因仍弊陋者數十年



矣今郭令以學古入官之才審於爲政之所重雖居小  
縣民寡事務叢劇之際能出謀備用不勞民力不取民  
財克瞻廟貌之成高廣巖翼有盛於昔以及他宇亦爲  
葺理事神育才咸盡其道實有以仰副國家崇重儒教  
之意雖古良有司之興學者殆無以過之夫令有善政  
不可使無聞於後世乃具其事之本末遣生員張敏岳  
某來求文於予將刻諸石以示永久遂爲之銘曰維此  
承壽惟有廟學千百其年爰始爰作或度孔庠或宇燹  
隳神不顧饗士荒於嬉有令學古式臨茲土乃怵於心  
乃惕於觀顧茲小邑式寡於丁聽言興之孰資於成我  
思其方有田斯植乃耕乃耘有年有積輸之百輶清澤  
之浹以有質無萬木委止工獻其巧人執其勤廟廡改  
作廊舊益新葺理之周爰及百宇神祀孔彰士有攸處  
師曰斯役惟令之功欽服國典教道日崇不有纂述將  
泯其實我銘是永勒於貞石

記

金

郭邦基重修惠民泉記永壽縣古麻亭驛也城在嶺之  
巔三面阻險攸居之人弗能鑿井宋嘉祐中呂汲公大  
防爲令時於城東甘水源相其地形鑿山爲渠引而入  
城百姓利之嘗歌曰泉之來兮東澗邊昔我勞苦今安  
然願公早入佐天子肅爲膏澤及民編因目之爲呂公

惠民泉歲月寢久兵革之餘泉渠圯壞無復存者泰和元年邢公珣由進士第主邑簿下車後歷詢耆耄苟有利害爲之興除衆以泉聞遂訪其源得故道有瓦甃之迹在焉不旬日間厥工告成其泉之通也歟焉老幼忻忻賡爲之歌曰我公來兮揚仁風當時澗水能復通濟人利物誰與同昔有呂公今邢公

元

單鵠重修廟學記永壽縣境於沮漆芮鞠犬牙相出入距古幽倍舍之許距今邠州一傳爾前宋隸邠州今屬乾州縣故有廟學庠陋傾圯今縣尉宋君思義捐俸鳩工益其庠新其圯崇不逾制儉不歉禮殿廡厨廡講授之室悉備又增學田二百畝云云

永壽縣志卷八

八

明

張朝綱遊武陵山記長安之西有永壽環邑皆山也五峰聳其東明月峙其西其北則達古幽分水嶺有天險關焉古稱秦中多形勝山光互映如永壽者亦鮮澗水分流泉甘而冽居民便之公劉詩所謂相其陰陽觀其流泉者疑卽在此說者以爲呂大防之所導也邑西有山山有寺寺有文筆峰時偕寮采邑博士諸君子政事之暇常登眺焉非浪遊也昔晉羊叔子好遊峴山宋歐陽子好遊滁山功德加於斯民聲施垂於後世顧予何人敢比前烈然觀文筆之峰則思青英才觀山下之阜



則思興水利瞻石山之空寂則思蕃樹植覽阪田之磽瘠則思勤稼穡週山四望有感然不得其所者皆吾赤子也思拯救而安全之是遊也豈浪遊如謝康樂之鑿山開道潘孟陽之飲酒遊山長夜忘返爲也其裨於政多矣顧時方尙名而余以實時方尙巧而余以拙行與時違人多惡之此山怪石礮龕不堪時用余以愚拙僣蹇不堪時用有類於石然砥礪頽俗琢磨文教自信少

有補於疲邑焉諸君子笑曰有是哉以其言書於孤崖

之石

學冊載張公大名宦祠記中云砥礪頽俗琢磨文教自信少有補於疲邑是遊誠非浪遊卽考言以

考績固宜  
戶祝啓宗

郭宗率惠民泉記永壽之邑據高控險土厚不可以井

永壽縣新志卷八

九

第頰水於郭東深澗中往來五六里強半爲亥徑其艱也可知余庚戌道經米一升易水不一斛然猶常直也暑雨寒沍或更倍蓰今以北山之泉注郭中於是水莫便於永縣矣前開封府檢校家居楊邦梁實爲之泉去郭七里卽東水之源建甌而下則趨澗迤邐渠之乃得入郭甚不易也故屢渠而屢廢嘉祐中呂汲公大防爲令蓋作始焉謂之惠民泉金太和中進士邢珣爲主簿因其圯壞修復之鄉貢進士郭邦基爲之記碑在邠州邠舊統永壽也至勝國時前業無復遺跡且不聞有呂與邢矣邑人白用掘地得故渠身自修之董節禮者爲

作白公通泉惠民記碑在今城隍廟邠州之碑白與董

未之見是以碑中之事泯而不傳此官府之所以不講也白氏之渠之廢已莫知歲年宏治間知縣李綱常一舉之不數年而弛楊據白氏之義竟毅然復舊貫云

本朝

張焜新創學官記古重司徒之官首隆學校之設凡以士之有學校猶農之有畝噲工之有居肆賈之有市廛也士雖正其義不謀其利明其道不計其功然幼學壯行之謂何上求致君下期澤民此亦研田之望獲美玉之待治安得不如農之藉膏腴工賈之爭闢闢哉永邑七罹寇烽學官灰燼士生其間何異農之失耕工賈之廢業以求出塗泥之中而致青雲之上其何道之從焜

永壽縣新志卷八

十

於康熙六年六月下車任事詢知永士科名自故明中葉至今一百四十年間杳然絕響不禁太息曰有是哉永邑文風之否耶隨下牒學師訂期集諸生會課每月率以爲常月閱若干卷隨時披削而等其高下一時穎異頗多因嘆科名之閭寂咎豈獨在諸士哉邑之宰菲薄其邑之士而以踈遠自安邑之士踈遠其邑之宰而亦以菲薄自待苟且因循而無鼓舞磨礱之氣遂致於碌碌而久無聞也夫長吏以養育人材爲急安忍學官之久圯而令士子無瞻依之所肄業之場耶因謀於廣

文任君縣尉傅君貢生趙君等卜地數處皆不吉乃復周廻審睇得吉地二畝許於城之東北隅卽日貸資百



金鳩工庀材而里中之紳衿義民亦樂助有差計工起於康熙八年二月初四日

文廟爲先兩廡次之戟門次之櫺星門又次之繼之以崇聖祠名宦祠鄉賢祠明倫堂而泮池環橋皆以次舉也旣蒞厥事乃以吉辰蕪香鼓樂率師生迎

聖牌登座先賢先儒各以次設列正禮拜間忽祥光繞橋門靈鵲集大成殿無不舉手加額慶是科必有達者是時也正康熙八年己酉六月初七日也未幾而屆鄉試期予亦闔分戴記房與衡文事及揭曉日拆號至十六名任子者壽三十八名羅子萬傑果皆以詩經中式榜發三秦競傳爲奇敬盥手備記以彰此舉之盛

張焜捐疏水泉記永壽山邑也地厚而燥土石間雜穴

之者皆焦枯少滋液掘深百仍不及泉居民素苦汲汲則挈壘抱甕行幾里而求諸絕壁之澗稍縱視失足鮮不破壘覆甕最苦雨中雪中汲徑滑步艱十汲而常覆三四覆則更汲不啻取明水於方諸仰甘露於仙掌也尤苦者東作方殷麥秋盛暑渴不得漿何以勝耕獲之勞往往求汲之益而荒半晌之工妨農莫甚於此不寧惟是永有驛驛賴馬力馬賴水草獨永之驛騎艱於飲多不及時且以奔馳疲乏之後策飲於險壑之下飲飽而騰躍於峻坡之上病馬莫甚於此其帶牛佩犢之苦又不待言矣予每太息曰民之苦恒在饑今永民又兼

苦渴耶日思所以濟之聞宋時有呂公泉特患無覓之者乃邀同廣文任君縣尉傅君貢士趙君等徒步禱祝尋泉之源約行八里許近分水嶺麓予思堪輿家有云凡龍之轉處卽有伏泉在下此正龍之轉處也隨令挾之漸有清液滲出再深挾之則汨汨然矣皆喜曰泉在是哉逾數十武挾之水溢又逾數十武挾之水又溢任君等俱狂喜曰求一泉而不可得今且得三異哉各以手掬飲三泉甘美不相上下而一種香味似下泉尤佳予於翌日卽捐俸募夫隄三泉於一道因勢順導開麓成渠高者削之使平陷者填之使聳石塹則鍾鑿而通之斷岸則剝木以渡之委蛇曲折導使入城因砌兩池以時其蓄洩上池便民之汲下池便畜之飲似可爲長久計矣乃未幾而土人告曰水道一帶土浮滲漏得水不多奈何又告曰堅冰將至水凍汲絕奈何又告曰無人勤修不時淤滯奈何予曰然哉然哉誠宜慮及此也因思水不就土則不滲水不見風則不凝乃命陶人製瓦桶數千順水魚貫覆以厚土其危險難施處則益以石覘令其伏流而往又募夫二名不時利導焉於是涓滴不漏嚴寒不凝四時無傾瀉之患可以世食水德於不朽矣嗟乎泉本無壞時而治泉者有懈時是在後之君子善爲經理之以勿壞已成之水利可也

盧化敬重修城隍廟記建邑而祀城隍將以奠安乎土



宇保障乎人民而旌別淑慝彰善癉惡於是乎行焉永  
壽自元時徙縣治於茲立廟於城之西北幾閱四百年  
其城郭有明末造至今凡三遷諸皆圯廢弗舉獨城隍  
廟故基無改棟宇屢新豈非以神之靈鑒人善惡能禍  
福人而人兢兢焉持邀禱之心因是虔恭罔敢替歟顧  
神之所以降禍福者匪邀而可獲禱而可免惟視乎人  
之善惡而旌別之載考舊碑靈爽昭格殆者安拂者若  
如響之應聲凡民之有願望其必請籲於神也固宜然  
而政以理陽神以理陰惑於義者謂陰陽之殊其教而  
不識幽明之一其理今夫理教備具國法森嚴樂循禮  
則順而祥輕犯法則凶而咎彼奸慝之徒視政教如弁  
髦扞文網而不知畏一與之言鬼神杳冥不可測之事  
則惕然懼作乞靈禱祀妄冀其罪戾之可以幸逃而庸  
庸者亦忽乎上令下供父慈子孝之常道祇爭聽命於  
禍祥庸詎知聰明正直鑒觀有赫天理之昭昭固在人  
心日用間修之吉而悖之凶蓋有一定而不移者夫豈  
徒區區趨避之所可得哉今廟貌所在聿新巍煥崇奕  
吾願瞻拜其下者思彰癉之靡忒力行善道以勿隳於  
邪惡曰且曰明自求多福則所以歆神祀而獲神庥也  
大矣不然金碧以塗之日考鐘伐鼓以告之卽曰所以  
事神者在是則非置邑立廟與今日修而記之之意也

新廟之勞邑義民唐運泰最著凌烟著梁丞協其事

蔣基新建火神廟文昌閣記聞之神體物而不遺人心  
卽神心之所感神隨應之彌綸布濩蓋已盈天地間視  
不必知其情狀也顧先王神道設教所以屬民非以愚  
民於是莊嚴顯赫廟貌巍然又千百年來如一日矣永  
邑嚮少火災戊申正月朔忽民廬遭回祿士恒務農撥  
科第鮮近歲有先後領鄉薦者僉曰火災賴火神救護  
科第屬文昌職司是不可不思所以祈之報之邑故無  
火神廟舊有文昌閣久傾圯靡存余因力圖創造冀爲  
吾永邑人捍禍患迓福祥爾會己酉冬以擇篆蓋屋去  
任半年事遂寢庚戌夏四月仍回永任爰度地經營於  
縣城內東北建火神廟於縣城外南關建文昌閣涓吉  
辛亥春三月戊材鳩工越癸丑秋仲藏厥事今而後庶  
幾廟貌常新神道益著吾永邑人枕席居安詩書澤裕  
無嚮出之聲有誦茲之樂於以捍禍患而迓福祥是亦  
余司牧者區區之願也夫按古者以火紀官舜時伯益  
掌火今道家火部諸神之稱儒者弗能深攻星經文昌  
六星其形如筐或云詩之張仲卽是其說頗不經總之  
祝融秉令繼照南離魁斗揚靈分光北極神日監在茲  
有感則有應實稽驗乎人之心而已獨火神文昌爲然  
哉是役也共費白金四百七十兩有奇除各量力輸費  
外餘費不足余悉任之以廟與閣同時議建故合記其  
事而并刻諸石焉

火神廟工或余旋署篆寧棗涓載  
則任始續建文昌閣故間時稍遲



明考

〔文翔鳳〕邠谷考略永壽為唐漆縣唐無漆縣當作漢求其漆而

弗得近始詢得於九變之陰細甚又不當率西之道其

建已蓋誤以率西之澣為漆沮而遂以名而吏又因縣

以飾實之亦豈果有兩漆沮如雍錄諸說謂詩書不相

協乎書稱涇屬渭汭漆沮既從同耀之水實入渭而清

碧如漆也詩止云率西澣不言漆奈何強而傅之西澣實麟

遊縣東南之漆水此說亦非其云自土沮漆亦非謂幽喚果在漆沮

間蓋道其遐僻之界而陶復固自在谷中也乃為善說

詩西澣蓋即今大峪底窖諸水而必以為率漆沮而西

也宜其裂詩書而二之寧州真寧蓋北幽幽之脉淳化

蓋南幽幽之腴同官耀州蓋東幽幽州永壽蓋西幽幽

之腋三水蓋中幽幽之腹而寧州真寧三水皆立幽谷

中谷九而原隰錯故謂之幽也

辨

本朝

〔蔣兆甲〕梁山辨省志載梁山在鞏州北十里秦始皇本

紀始皇三十五年幸梁山官顏師古注梁山在岐山東

九嶷山西魏書地形志漢西縣有梁山括地志山在雍

州好畤縣西北十八里元和志梁山高宗乾所在地理

通釋山在京兆府奉天縣北五里又扶風志亦載梁山

在縣東北六十里據此梁山當以在乾州爲是麟遊縣

志恐誤

此條從岐山縣志採入

按麟遊縣志梁山卽縣治山原又云縣治爲梁山舊址周太王去邠踰梁山卽此永壽乾州二志皆有梁山非是其意蓋謂乾永之梁山乃秦宮唐陵所在而非太王之所踰也此緣親歷其地而知非從紙上得之者且顏籀魏收李泰李吉甫王應麟之屬亦未嘗謂乾永梁山卽太王所踰岐山志乃承孔氏詩疏之誤而駁之無乃非其所是與

又案史記周本紀去邠渡漆沮踰梁山麟遊志謂漆

水在縣東南

後漢書注沮水不知所在

合普潤以東之岐水入渭

永壽縣新志卷八

共

此正漢書漆縣之漆縣詩所謂率西水滸者是也太王當日必渡此水然後西踰梁山迄今數千百年光景宛猶在目可謂史中亦有畫矣總之踰山渡水顯然俱在麟遊諸儒聚訟紛紜無異盲人道黑白也

詩

唐

岑參送永壽王贊府歸縣云當官接閒暇暫得歸林泉

百里路不宿兩鄉山復連夜深露濕簾月出風驚蟬且

盡主人酒爲君從醉眠

耿漳邠南留別云長路來還去生涯竟若何艱難爲客

慣貧賤受恩多暮角寒山色秋風遠水波無人見惆悵



垂韆入煙蘿

戴叔倫建中癸亥歲除夕宿武陵山北村云歲除日又暮山險路仍新驅傳迷深谷瞻星紀北辰古亭聊假寐中夜忽逢人相問皆嗚咽傷心不待春

于鵠贈承壽王道者云去尋常不出門似絕人行牀下石苔滿屋頭秋草生學琴寒月短寫易晚窻明惟到黃昏後溪中聞磬聲

許棠過穆陵關云荒關無吏守亦恥白衣過地廣人耕絕天寒雁下多東西自感雨雪更相和日暮聊攄思搖鞭一放歌

僧齊己詠明月山云明月山頭石曾聞學月明別舒長夜彩高照一村耕頗亂無私理徒驚鄙俗情傳云遭鑿後頑石任崢嶸

明

李夢陽古幽道中云高原驄馬曉嘶風歷歷封疆一望中畝有耰鋤溝遂改野無鞞犂處廬空幽山涇水遺民慶秋穀春蠶啟國功讀罷二南歌七月始知深慮是周公

曹愈秋日承壽道中卽事云分水通煙市偏峯挂古城鷄聲層漢落人語亂山鳴蕭瑟迎秋起蒼茫遂晚生慚予忝岳牧那復賦西征

東郡楊魏承壽道中云不知山縣處忽聽午時鷄城郭

到方見煙雲看漸低人疑勾漏令地卽武陵溪正是花  
開日香風趁馬蹄

侯加乘謁建信侯祠云楚炬煙消霸業傾俾雲堞不  
勝情尋常輓轅回鑾轅百二秦京復漢京今日驚番遺  
骨匣邑人謾指種金坪山頭髣髴忠魂在明月年年對  
鳳城

又長夏漫咏云暑過山城客不知每逢風雨動寒威日  
中不用搖紈扇伏裏何曾試葛衣深院晝長閒燕語疎  
簾星定見螢飛豎儒飽食渾無事夜夜晴垣看紫薇

蘭陵許之漸過承題云何處通煙市孤城峻岌懸寒雲  
連漢時分水劃秦川樸俗虛機杼荒墟罷管絃奉春霞

舉後明月祀仍延

承壽縣新志卷八

六

本朝

李如瑾莅承吟云先王遺澤遠禾黍見南豳執簿鶉衣

吏登俸草食民但能安下考不必嘆官貧遙憶千年上

公堂朋酒醇 伐鼓山城曙開門粉堞低瓦盆收宿霽

古樹散寒鴟地儉渾忘禮年豐不免飢關心惟驛使日

日聽傳旗 縣小常無事栽花亦滿城疎枝經雨直涼

葉帶雲橫斫竹探泥酒排沙得水秬江南昨有信怪爾

食魚羹 三邊惟一道此地屬巖疆馬足回崖短車輪

過破長村荒餘麥飯戍老卧泥牀何處蘭風至前溪飲

麝香



趙運熙題兩郊古栢云虬栢如林壯地形數尋偃仰接  
蒼冥荒廬衰草經秋白故國修柯隔代青村老霜姿同  
士節影寒雲氣對山靈惟餘喬木烽煙後弔古窮鄉也  
涕零

無名道士過永留題云經過諸郡縣未有此荒城仄路  
三盤上單街兩面傾避風依左戶賦水下西坪中伏寒  
如臘天何太不情 山水多竒怪秦中得武陵書生纔  
作吏宦况略如僧勸課文無害循良事有徵琴堂終日  
閉六月一簾冰 戶口擁兵火窖居百十家土深難甃  
井縣小易爲花深水原非漆室亭詎有麻終年無訟獄  
寂寂鎖官衙 數日僧寮卧空山乏水薪不因行役到  
寧恕宰官貧廉吏歌聞楚無衣客在秦夜來明月下促  
席好吹豳

蔣基抵永壽境云驅車西邁入秦中蔬屨初辭半畝宮  
問俗定歌今樂土披圖儼讀古幽風山區戶小宜藏富  
斗暑官閒合固窮地角天涯隨所遇人生蹤跡類飛鴻  
又麥秋至志喜云南幽故小邑孔道當東西山阪苦境  
塿耒耜勤歲時厥民五里輯厥壤五等稽厥田四千頃  
厥賦供黔黎孟夏土膏發小麥大麥齊黃雲覆綺陌翠  
浪搖煙畦歡呼耦耕叟鼓舞饁餉妻收成十分報疆吏  
飛章馳皇天生庶物滲漉敷華滋三農九穀播率育來  
牟貽有秋重力穡風化陳陶詩長思日至熟字甯春塋

趙希瓚詠梁山云梁山之說何紛紛毛詩本自存其真  
 率西水滸至岐下東尋好時來周原後人聚訟愈失實  
 沿流胡遽忘討源周原膺膺接幽壤一山橫界生烟雲  
 踰此可限戎馬足旌旄照耀河之濱好時昔稱美田地  
 秦宮秦時交璘珣乾武東北界永壽毗連綿亘相迴環  
 鷄閣添虛自上古陶復陶穴看躋攀李斯車騎祖龍怒  
 古公播遷岐鳳聞險阻踰越幾千載經生追論慙分門  
 馮羽扶風自逕別鄭注孔疏誰宜刪摭擣不厭涉誇大  
 掀捃無當空煩言牽率晉望與秦望猶如坐井忘朝昏  
 我偕半菴勤考据時延費東王平菴修永壽縣志徒笑數典同家珍好  
 時流長山永奠岐周密邇東西分

永壽縣志卷八

三

永壽令胡長慶古幽雜詠云昔作天子宮今為耕牧處

文石無復存牛羊自來去梁山官引水上山巔人誇舊令

賢我亦宰斯土恩膏媿此泉惠民渠朝朝聞曉鐘偶一到

山寺山寺寂無人風吹野花墜武陵寺山拒虎頭險星軺

處處逢守闕不用吏時有白雲封穆陵關何必洛伽山處

處皆淨土願將座下泉常化人間雨普渡寺余性愛讀書

用世無一策胡為昔時人乃與余同癖讀書洞剝腹救皇

嗣愛國不愛身千秋荒塚上猶有拜唐臣安金藏點石已

怪異種金猶渺茫黃金如可種人盡廢耕桑種金坪軒皇

神武姿到處營衛立玉帛已銷沉寒鴉尚翔集軒轅殿何



用誇衣鉢真僧道自隆此心無住者始覺本來空

碧峯  
翠波

又同沈霞浦賀梅坪諸君遊武陵山云携侶出西郭暫  
釋塵俗累行行路非遙幽岑卽已至繞逕雪未銷鼓勇  
愁傾墜羊腸幾曲盤軒豁得初地凌虛縱遠眸悠悠動  
遐思五峯東環青明月西聳翠三秦形勝多此亦具佳  
致因思洪荒來山川已定位遊人恒河沙更僕難數記  
吾輩復登臨渺然歎孤寄不見古遊人但見古來寺古  
佛苔蘚侵塔影尚獨歸山僧持袈裟云是前明賜佛言  
萬法空一袖何足異吾輩且飲酒酩酊莫辭醉春氣昨  
已來韶光漸明媚擬待桃花開再策尋芳騎

日來

古

永壽縣志

卷八

七

萬法空

一袖何足異

吾輩且飲酒

酩酊莫辭醉

春氣昨已來

韶光漸明媚

擬待桃花開

再策尋芳騎

延因思將

荒來山頂

日空於遊人

何處更

難數記

愁傾墜

羊腸幾曲

盤軒豁得

初地凌虛

縱遠眸

